

Remitido

Chupado

Hopi biaha bo ta topa un chupado bisti tur na bachi ta cana

Bo no por conoce di biaha pasobra e ta aparenta di ta un di bo mihor amigonan di trabao

Kende ta bay yudabo sali di bo miseria mientras e mes ta den problema.

Su palabranan escohi semper ta:

"No worry, mi ta bay papia cu ne pabo"

Mientrastanto e kier meen:

"No worry, mi ta papia cu ne over di bo, pa mi"

Tur ramo tin su chupado. Na su cana bo ta conoce.

Pasobra su papia ta mucho complica pa bo por ripara cu aki bo tin di haci cu un chupado di alto grado.

Si bo no weite u merdia ora di trabao, ta pasobra e ta trahando ariba bo, cerca bo hefe.

Bo no por mire drenta ni sali di oficina nunca, pasobra su oranan di trabao ta discreto. Chupado tin hopi di haci cu carpata.

Carpata ta chupa pa e biba y chupado ta biba pa e chupa. Semper chupado ta rond di hefe extranhero. Ey banda nan ta gusta traha ncishi, pasobra straño no conoce su pasado.

E chupado peligroso ta esun

cu ta bira chupado na caminda.

Esun cu nace chupado ya nos tur conoce di chikito.

E no sa tira stichie pero toch e mag di bay tira juana.

E no sa hunga futbol pero toch e ta midvoor.

Den tur empresa grandi of chikito bo mester haya un chupado.

Enfin, si bo mira un hende na trabao cu kier bo bon y e ta den un posicion cu e por yudabo y toch bo ta sinti cu bo ta bay atras.....

Bo sa cu esey ta un.....CHUPADO.

Etty Toppenberg

A.O.V. y belasting

Den ultimo lunanan bo ta tende tur parti di Aruba cu doñonan di trabao cu ta retene, e A.O.V. y Loonbelasting-Solidariteitsbelasting etc y cu nan no ta ser entrega na tempo of at all na Gobierno/Ontvanger.

Na Aruba tur cos ta posibel, ta un verguensa cu bo tin di tende con cierto doñonan di trabao cu a bati bancarota, bende negoshi bandona Aruba, negoshi ta ser kita di nan ysera. Etc. etc, cu durante nan tempo a kita e A.O.V. y cierto belastingnan no a entrega nan na Gobierno pa despues ata trahador ta haye cu un asina yama Deurwaarder na cas of un beslag. E sistema aki no por sigui, mester bini un ley cu ta preveni e doño di trabao di bay cu e

placa aki.

Experiencia a mostra cu tin varios doño di trabao cu a haci nan mes culpable na verduistering, door di a retene sumanan grandi di trahadornan y no a entrega e suma aki na Gobierno/Ontvanger, pa despues ata trahador mester paga nan un biaha mas.

Den e asunto aki Gobierno tambe tin un parti culpable. Door cu Gobierno su departamento concerni mester por manda pa tur pagador di e A.O.V. y belastingnan, un recibo cada 4 o 6 luna cu Gobierno a ricibi di tal doño di trabao e suma den trahador su nomber. Pa asina e trahadornan tin un garantia cu nan placa cu a ser kita a ser entrega na Gobierno. Actualmente trahadornan no tin nin-

gun garantia cu e suma cu a ser kita di nan a ser entrega na e instancia concerni.

Tambe mester bira posible, cu si acaso e suma aki no ser entrega pa un fecha stipula pa Gobierno, e trahador concerni por haci un denuncia di ladroncia contra e doño di trabao. Ya ta visto caba cu e boet cu gobierno a stipula no ta haci ningun efecto ariba cierto doño di trahadornan.

Un consejo na tur trahador: Tur trahador cu ta pagando via nan doño di trabao, sea kico cu e ta, sea asina bon di yama y check tur luna si bo placa cu a ser kita pa x-motibo, a ser entrega na e instancia concerni.

Sonny Harms
Tangerinestraat 1.

Pakico Gabinete Eman a laga Mc Guire bay

Mi estimado redactor, aki mi ta pidi bo un espacio den corant tan lesa. Aki e remitido ta pa gobierno di Aruba esta Gabinete Eman.

Mi kier a pidi Ministro Vos di con nan a laga Mc Guire bay sin cobrele loke e debe Aruba. E si nan no a cobra pero nos cu ta pover nos si ta worde bisa si bo no paga recibonan atrasa nan ta corta bo awa.

Pero Mc Guire si a bay su lugar back cu miles di Dollars pa Aruba nan no ta. Cobra si ta ley pa nos mester ta ley pa stranhero tambe.

No ta asina cu bo ta cobra tur

hende na Aruba anto Mc Guire si ta bay cu hopi Dollars pa Gobierno. Nan sa pakico nan a laga Mc Guire bay pasobra si el a keda anto e mester a papia hopi di nan garganta lo ta bola afor ta pesey nan a lagele bay pa nan nan haci loke nan kier cu pueblo di Aruba.

Arubianonan habri boso wowonan pasobra gabinete Eman ta van plan di haci y sigui haci. Nan ta bahando onderstand di hopi hende di mi mes nan a baha pa nan haya e placa pa nan saco.

Nan ta bisa cu Aruba no tin placa pero ata nan a bay

Curacao pa celebracion di Staten di Curacao, Ministro Engelbrecht, Mito Croes tambe anto Aruba no tin placa pero tin placa pa nan biaha si tur caminda.

Te aki mi ta termina mi remitido.

C.C.



Horoscopo

ARIES

Maart 21 - April 19

Acontecimientonan inespera lo brindabo mas placer cu e cosnan cu bo a planea.

Number di suerte awe: 17

TAURUS

April 20 - Mei 20

Ta importante pa bo mantene e bon humor pa por reacciona asertadamente.

Number di suerte awe: 62

GEMINI

Mei 21 - Juni 20

Bo mester depende di yudansa ahe no mas di loke abo kier. Un persona di confianza lo yudabo.

Number di suerte awe: 77

CANCER

Juni 21 - July 22

Awe lo ta un bon dia pa bo practica bo ideanan y inicia actividadnan.

Number di suerte awe: 56

LEO

July 23 - Augustus 22

Lo bo sinti bo mes satisfecho cu e acogida cu bo lo ricibi di bo intencionan pa renoba contacto cu amistadnan leu.

Number di suerte awe: 78

VIRGO

Augustus 23 - September 22

Un descanso cortico lo por ta suficiente pa rebiba bo interes na trabao ya cu bo ta muestra cansa.

Number di suerte awe: 72

LIBRA

September 23 - October 22

Trata di defini, prome cu tur cos, si e problemanan existente no ta debi na e exeso di familiaridad.

Number di suerte awe: 90

SCORPIO

October 23 - November 22

Bon dia pa relacionnan personal y aunke sosode algun diferencia di opinion bo sa con pa defende bo mes.

Number di suerte awe: 02

SAGITARIUS

November 23 - December 21

Si bo ta desea pa bo actividadnan practico concretisa, e iniciativa mester bin di bo.

Number di suerte awe: 83

CAPRICORNIO

December 21 - Januari 19

E pasado tin hopi influencia ariba un actividad actual. Bay poco poco.

Number di suerte awe: 14

ACUARIUS

Januari 20 - Februari 18

Quizas algo cu bo a cuminsa cu ne un tempo awor lo ta conviniente pa bo.

Number di suerte awe: 16

PISCES

Februari 19 - Maart 20

Den oranan di anochi lo bo tin e ocasion pa sobresali ariba e tereno social.

Number di suerte awe: 82

